

錢塘縣志卷之二十二

錢塘縣知縣南樂魏嶠纂

人物 文苑

古稱三不朽一曰立言文也者言之屬也錢唐地靈人傑實產異才自三國六朝丁褚而下郁郁賓賓稱極盛已嗚呼標榜盛而實學衰謏聞起而影響衆若馬扶風鄭康成之徒今有其人乎鮑謝應劉風雅間作王楊盧駱駢偶稱長凡具古人之偏者擴藝林之譽者例皆得載焉志文苑

錢塘縣誌

卷之二十二 人物文苑

一

吳

丁謂 時尙門閥而謂地族寒微與陽羨張秉烏程吳粲並陸全之列仕吳至典軍中郎將

晉

褚陶 字季雅少而聰慧以墳典自娛年十三作鷗鳥水碓二賦見者奇之陶嘗謂所親曰聖賢備在黃卷中舍此何求吳平召補尙書郎張華見之謂陸機曰君兄弟龍躍雲津顧彥先鳳鳴朝陽謂東南之寶已盡不意復見褚生仕至中尉卒宋時有褚舍褚邊皆其後裔

齊

宋廣之 字處深喜清談初顧懽著三名論以正四本之失時賢並爲論難而廣之獨爲精詣

唐

章孝標

元和中進士下第作歸燕詩上考官庾承宣與知舉侍郎鄭愚唐百家詩載其集子碣登進士亦能詩唐時錢塘以詩名者惟孝標父子

宋

錢昆

字裕之儆之子登進士第累遷至三司度支判官歷知七州治尚寬簡以秘書監致仕卒年七十六昆善為詩賦又善草隸有文集十卷

楊大雅

字子正十歲作雪賦稍長日誦書數萬言端拱二年乙科登第咸平三年交趾獻犀大雅獻犀賦召試學士院明年上書獻所為文二十餘萬言乃直集賢院歷二十五年不遷或笑其違世自守大雅難曰吾不學乎世學乎聖人吾之所有不敢以薦於人而嘗自獻於天子矣天僖中奉使淮南按部過金陵

錢塘縣誌

卷之二十二

人物文苑

二

陵江上遇風冠服盡失丁謂遣人遺衣一襲大雅不受宰相王欽若亦不悅雅晚與陳從易並知制誥出知亳州卒所著有大隱集職林兩漢博聞若干卷大雅幼孤自立刻苦為文躬儉約不妄進取人稱其為有德君子子洎濬泳漸沈瀕六人

錢易

字希白年十七舉進士御試三題日中而就有司簡曰朕恨不與李白同時易簡曰今進士錢易為歌詩殆不下白上欲用唐故事召至禁林值盜起劍南遂寢咸平二年再舉進士甲科為光祿寺丞通判斬州上疏乞除非法之刑帝嘉納其言景德二年舉賢良方正科除秘書丞擢翰林學士卒易才思敏贍數千言援筆立就真宗封泰山獻殊祥錄祀汾陰命修車駕所過圖經獻宋雅一篇易歌詩有義山長吉體而俊逸過之又善行草書有金閨瀛洲西垣制集一百六十卷青雲總錄一百卷洞微志十卷子二長彥遠次明逸

錢明逸

字子飛舉才識兼茂科父子三人皆中制科世以為榮累官翰林學士卒贈禮部尚書謚修懿

沈遼

字睿達邁弟也少好學傲睨一世讀左氏班固書少摹倣之輒近似乃鋤直縱舍自成一家長於詩

歌尤工翰墨王安石曾布皆學其筆法安石得其清勁布得其真楷趨操高爽不喜進取登第後遊京師偶為人書裙帶內侍質入禁中神宗初嗣位勵精求治見之不悅會遣使察訪兩浙就以諭之時遼為吳縣令遂遭劾王安石救之不能釋乃坐削籍後卜居池陽築室曰雲巢好事者多往遊焉遼追悔平生不自貴重悉謝棄少習杜門隱几間作為文章雄偉綺鍊曾鞏蘇軾黃庭堅皆與唱酬然竟不復起元豐末卒所著有雲巢編

韋驥

字子駿生而警敏年十七以文謁王安石安石甚稱許之曰吾行江南入吳越見文士唯子與董固

行耳由是名籍盛每一賦成學者傳誦既登進士累官利州路運判移福建路年饑議請賑貸驥以去京

錢塘縣誌

卷之二十三

人物文苑

三

遠不及上書待報乃檄州縣發廩而自請違法之罪於朝聞盜險阻為州縣患吏畏怯爭言招納驥曰是為民稔患因處畫斬捕方畧咸就捕部內肅然召為主客郎中出為夔州路司憲知明州提舉洞霄宮卒驥樂易靜退孝友廉平文章藻麗所著有韋先生集二十卷賦二十卷

周邠

字開祖嘉祐八年登進士第熙寧間蘇軾倅杭多與醇唱所謂周長官者是也

楊蟠

字公濟章安人貫杭州登慶曆六年第嘗作錢塘百咏詩歐陽修讀其集有詩云蘇梅久作黃泉客

我亦今為白髮翁卧讀楊蟠一千首乞渠十月與春風王安石有答蟠書曰讀足下之文但知畏之願造讀所聞蘇軾守杭蟠為郡丞與軾倡酬平生為詩數千篇後知壽州提點荆廣鑄錢卒

周邦彥

字美成疎曠少檢不為州里推重而博涉百家言元豐初遊京師獻汴都賦萬餘言神宗異之

命侍臣讀於邇英閣召赴政事堂自太學諸生一命為正字五歲不遷益肆力於詞章出教廬州知溧水

縣遷為國子主簿哲宗召對使誦前賦除秘書正字  
歷校書郎考功員外郎兼議禮局檢討官至徽猷閣  
待制出知順昌府彥工文章妙音律其樂府盛  
行於世自號清真居士有清真集二十四卷

**吳天秩**

字平甫幼聰悟勤苦該洽學者多從焉姿性恬  
退不嗜榮利杜門著書幾二十年後薦補太廟  
齋郎不赴授大庾尉辭再調浮梁尉到官逾年歿有文集五十卷

**張雯**

字子昭其先浚儀人南渡居錢塘力學嗜書所居  
臨市衢構樓藏書尤精於律呂每眾坐聞樂輒俯  
首頷蹙曰吾其不免乎於時宋亡故官老校猶有存  
者從之問宋遺事朝廷宗廟宮室車輿朝會宴享生  
殺咸得其詳所著書曰繼潛錄書畫補遺墨記子田  
亦工文詞田子肯少從金華宋濂學所為詩文精麗  
有法尤長於南詞新聲

**汪元量**

字大有為詩感慨有氣節嘗以善琴受知紹陵  
宋亡從三宮北去留燕甚久時故宮人王清惠

錢塘縣誌

卷之二十二

人物文苑

四

張瓊英皆善詩相見輒共涕泣或至文文山狼當所  
作尚幽十操文山倚歌和之元主聞其名召入鼓琴  
一再行乞為黃冠歸錢塘與故宮十人釀酒城隅  
哀音哽亂淚下如雨既歸往來匡廬彭蠡間若飄風  
行雲莫能測其去留之跡自號水雲子有水雲集量  
自奉使出臨三宮去國所歷故都遺跡可喜可詫可  
驚可哭者皆收於詩史  
辰翁馬廷鸞日日詩史

元

**錢惟善**

字思復博學能文章長於毛氏詩至正辛卯舉  
於浙其所言羅利江賦為世所稱官至儒學副  
提舉莆田陳衆仲雲間  
夏溥序其詩文稿行世

**楊載**

字仲弘其先自浦城徙家錢塘載少孤事母孝博  
涉羣書年四十以布衣召為國史院編修官延祐  
二年舉進士為浮梁別駕改寧國府推官載為詩文  
以氣為主黃文獻公評其文博而敏直而不身尤以

詩名家人問作詩法答曰詩當取材於漢魏取音節於唐人多宗之與虞集揭傒斯范梈並駕齊名世稱虞楊范揭云洪武初祀於杭鄉賢祠

**楊彝**字彥常登進士第官至翰林學士以古文詩見重於臺閣工篆隸真楷張伯雨自負詞翰名然自以爲不及

**仇遠**字仁近元初爲溧陽州儒學教授工詩文一時遊其門者若張伯雨張翥莫維賢皆有名當時所著有山村集批註唐百家詩選洪武初祀杭鄉賢祠

**張翥**字仲舉其先晉寧人父爲吏官杭州鈔庫副使因家焉翥少負才豪放不羈好蹴鞠喜音樂不以家業屑意父憂之翥一旦翻然改業謝客讀書晝夜不暫假受經學於李存得道德性命之說多所研究復從仇仁近學詩盡得其聲律之奧遂以詩文鳴於時及門甚衆翥勤於誘掖絕去崖岸用是學者樂親炙

錢塘縣志

卷之二十二

人物文苑

五

之有質經義者必歷舉衆說爲之折衷辨論至元末以薦起家累官翰林學士承旨封潞國公致仕卒年八十二翥長於詩其近體長短句尤工無子多散佚者僅有樂府律詩各三卷又嘗集兵興以來死節死事之人爲書曰忠義錄

**劉濩**字聲之其先莆田人占籍於杭劉汶字師魯宋鄜王錡六世孫二先生俱以德行文文章淑後進洪武初皆祀學鄉賢祠

**張昱**字光弼元季官浙省左右司員外郎卜居壽安坊剛簡亮達左丞楊完者提兵鎮江浙時昱畧參謀其軍府事一時聲望赫然既而上敝衣糲飯著書賦以自逸所居湫隘自署蓋自擬晏子云後宰敝友人凌彥冲爲募貲以輯之

**白珽**字廷玉博綜經史詩文一主於理嘗著西湖賦一篇考據精核紫陽方回劉辰翁稱其詩過陶韋

暹顏柳仕至浙江儒學  
副提舉所著有湛園集

明

高得賜

字孟升洪武間以文學薦授臨安縣學教諭  
高州府學教授永樂初召為宗人府經歷纂修  
大典為副總裁進講春官博學洽聞詩文純雅名重  
一時所著有節菴集姚廣孝嘗稱其詩韶濩迭奏綺  
組雜陳江漢奔流曲折千里  
而不可遏洵一代之奇作云

白范

字以中號西塘才敏學瞻詩格清奇  
仕至黃州府同知所著有虛室集

俞友仁

字文輔洪武初設科發解浙省第  
一詩書亦俊逸仕至校官卒

羅佑

字吉學博才瞻風致俊朗少不為其父所知鄉  
人張彥復日福建檢校回家佑父殺雞具酒待之  
每年十月適自學舍歸彥復指雞為題佑應聲賦之  
彥復大加稱賞手寫桂花一枝并題其上以贈佑父

錢塘縣誌

卷之二十二

人物文苑

六

遂構傳桂堂一時名人凌彥冲丘彥能吳敬夫輩與  
為忘年友一日揚廉夫訪之出所作香奩八咏佑悉  
和之廉夫曰此瞿家千里駒也洪武中以薦授仁和  
訓導轉臨安教諭陞周府右長史師道振舉輔弼有  
法永樂間以詩禍編管保安久之釋歸復原職年八  
十七卒所著有春秋貫珠詩經正葩閱史管見鼓吹  
續音存  
齋詩集

盧浩

好古博學其為詩如不經  
心天然超詣流輩罕及

莫維賢

字景行洪武初為府學訓導好學能詩築別業  
於靈隱天竺間繞屋栽杏號曰杏園日與騷人  
墨客游泳其中時人比之  
輞川所著有廣莫子稿

梁建中

早嗜伊洛之學復有志於文辭下筆滔滔數百  
言皆典雅溫厚絕不以聲牙信偏為奇一時士  
大夫皆稱譽之金華宋濂序其文集濂門人稱  
建中刻苦好學老而不倦以比漢之袁公業云

王羽 字儀之 洪武庚午舉鄉試第一 二十四年登進士 爲人方正敦重恬默自持爲文根極理要不事友

蔓子宗賢鄉貢進士仕淮府長史

陳贊 字維成 自餘姚徙錢塘 洪武間以薦授府學訓導 擢翰林待詔進博士 命教內監冲和坦易人咸親

之官至太常少卿所著有自怡容臺諸稿

王洪 字希範 洪武三十年進士 以文學授翰林當開國 時四方貢獻不絕如麒麟白澤元兕騶虞芝草醴

泉之屬凡頌歌詞賦率以命洪 洪揮毫敏捷所撰制 雖一時前輩咸遜謝不如與修永樂大典爲副總裁

時秉筆者位在洪上 洪持正不阿至欲載其家乘瑞 應之徵又力言以爲不可緣是見忌左遷禮部主事

會太宗伯奉勅巡行關陝 凡部事悉命洪敷奏論事 詳明朝廷方屬意重用而竟以未疾不起年僅四十

有二洪少存軼才與解縉王璉王備王達善齊 名號五才子所著有毅齋詩文集八卷行於世

錢塘縣誌

卷之二十三

人物文苑

七

王榮 字希仁 永樂中以乙榜進士授全椒學訓導陞淮 府左長史至宣德朝歷官太僕寺卿致仕榮天才

敏捷爲文不屬稿數千言立就有西 漢氣骨立朝五十餘年聲實並著

俞和 字子中 冲澹安恬隱居不仕能詩喜書翰工趙文 敏書法好事者得其書雜題帖中舍卒莫能辨

徐伯齡 字延之 博學強記洞曉音律尤工樂府嘗雜集 爨瓦數十枚考其音之中律者奏曲一章俄頃

而協所著有蟬 精集二十卷

馬洪 字浩瀾 以辭賦擅名東南清修苦節授徒以給養 親之費皓首韋布而含珠吐玉聲價益重所交皆

一時名士每過從出游衣冠雜集車從都雅洪獨葛 中草履高步其間人望之昂然若野鶴之在鷄羣詩

有大曆風致詞調尤極妍麗每一篇 出人爭持稿去不甚惜故亦不甚傳

吳鼎 字維新 少慧嗜學以文章雄一時 正德丁丑進士 授臨淮令臨淮爲太祖發祥地有湯沐恩民多習

游惰鼎剽裁便決以辨治稱屬武宗南巡侍衛騎從數十百萬縣次續食有權貴人鼓焰先驅非分需索鼎愛民持不與遂觸其怒因呼挺挺令鼎銳身先吏民當之吏民爭前衛鼎反擊傷權貴人事聞逮詔獄嘉靖初始釋復原治歷南刑兵二部郎遷廣西參議不赴鼎伉厲守高魁然負氣以直節著沉涵六籍旁覽百氏爲文法西京所著有泉亭文集子遵晦進士山東按察司副使侃侃直亮類其父時又有高讓王正道常貞何敬皆錢塘人博學工詩文俱負文章重名

許應元

字子春嘉靖壬辰進士知泰安州以苞苴不入忤分宜久之出知夔州府與學勸士輯和民獠每低徊三閭少陵遺跡彬彬儒雅稱儒吏焉已遷四川憲副改廣西誅三巨獍辭已功掩前官之罪人稱其厚轉右使卒元自幼穎敏游心藝林爲文宗西京與李何起衰復古爲武林倡夏文愍目爲錢塘才子所著撰有漪堂水部等集弟應亨字子夏爲詩具六朝初

錢塘縣誌

卷之二十三

人物文苑

八

唐風味海內稱二許子次紆能嗣其業孫惠一舉進士應亨子仲譽萬曆辛卯舉人

田汝成

字叔禾性穎敏博學強記流覽百家言覃心作述爲文沉涵濃郁有東漢齊梁風尤善爲記事書纒纒多雅致兩爲督學使者盛有文譽在閩尤得士心有田叔禾集西湖流覽志行世杭士自弘正來揚聲藝苑者汝成爲最

田藝術

字子菀汝成子以貢教授應天博學善屬文自弱冠以詩賦著聲海內名公爭交讎焉所著前後正續集數十卷雜著數十種多閩好奇世以比之成都楊慎爲人高曠磊落不可羈馭至老愈豪朱衣白髮挾兩女奴坐西湖花柳下客至卽其座酬倡斗酒百篇人又擬爲謫仙云

楊祐

字汝承少英敏博學年十八領鄉薦八年始成進士改翰林庶吉士明年出知興國屢遭讒忌時起時蹶歷官湖廣按察司僉事以暴疾卒於官年纔四十餘耳嘗是時北地信陽以古文雄視西土而大江



以南則故翰林江瀾參議吳鼎共祐後先崛起初祐之上計京師也鼎嘗作叙送之以為賈生明國體匡衡富經術不是過也祐亦獨喜自負為文章奔放凌轢若颺起泉湧其才氣沈雄岸偉旁不見曹伍然亦以此見忌身不安位而年不竟才世共惜之所者有端居興國西曹郵城濟南西江湖上荆南諸集藏家

**洪澄** 字靜夫少善文以孝廉官中書舍人詔誥雅贍

**方九叙** 字禹蹟號十州少即嗜古工文長與海內諸名習邊務將率憚之葺倉貯穀散種食於民不徵其息比代闔郡號哭擁馬首不得行偽留傳舍乘夜間去積官知承天府性抗毅直行屢忤巨璫遂投劾歸益討故業易綺麗入冲雅為人高朗善論事負經濟之才不究其用世共惜之

錢塘縣誌

卷之二十三

人物文苑

九

**茅瓚** 字邦獻少時夢神人授二巨字文曰見滄因以為號讀書寶奎寺山巔始至夜雷雨大作崖崩數十

丈獨所居無恙質明露見滄二大字蓋故鏡宋理宗御書適與夢符中戊戌第一甲一名歷南北祭酒禮部侍郎兼學士加太子賓客賜服

**仙鶴** 飛魚以吏部左侍郎引歸

**周詩** 字興叔嘉靖己酉舉鄉試第一丙辰成進士令南陵任丘皆有惠政歷官都給事太常寺少卿右通政詩詞藻綺天才俊逸

銳精藝苑傲睨一世

**吳之鯨** 字伯裔文才俊爽高自標置每一脫稿輒付剞劂或規之曰吾以防散逸耳與吳大山稱江寧二俊太史馮夢禎學僉黃汝亨相友善所著詩文富萬曆己酉舉於鄉數上春官不第謁選得

甫六月卒所著有武林梵志十卷閩詩一卷

**沈守正** 字無回萬曆癸卯舉於鄉謁選得黃巖教諭國子監博士擢都察院司務守正高才博學詩文俊爽喜為蘇白體黃汝亨胡嘉胤咸推許之部守正某俾其子弟師事焉台卒謀海遊郡守丞緒守

策叅政張師繹單騎入台守正伏謁道左師繹曰劇  
孟在此吳楚無憂正為設方畧殲大憝解株連口不  
言功中丞  
益重之

聞啟祥

字子將博綜羣書尤工制舉業武林東南都會  
於祥品題甲乙命梨棗日行卷制義之有行卷自祥  
始萬曆壬子舉於南雍嘗與吳郡李流芳同與計吏  
入京師已及國門忽意不自得趣車徑返後屢以薦  
被徵悉辭不赴性好延納每庀舟車飭厨傳宴會賓  
客若置驛然所著有自娛齋  
稿弟啟禎子淡明亦有聲

丁奇遇

字孟嘉萬曆間古學寢衰業舉子者相戒蓄經  
史觀牙籤錦軸陳書數十篋則詆訶為虛成物  
荒陋成習奇遇勵志復古與聞啟祥虞宗瑤宗玖嚴  
調御武順救創讀書社一月數會性孤異作文謝華  
振秀務為奇雋讀禮記疑其註未善覃精析義嘗至  
夜分心有感觸拍案狂呼曰始得聖賢意嘗乘舟入

錢塘縣誌

卷之三十二

人物文苑

十

茗溪與二二門人列坐榻管為人代草啟事忽耳中  
有聲謂人曰如此疾雷耶未及答顧視左耳則血從  
裂縫中出衣若染茜漸昏迷  
不省病數年卒有集十卷

吳杉

字松侶自鹽官徙錢塘杉少敏捷才氣奔放天啟  
丁卯舉於鄉年止十八清姿玉立望傾流輩是歲  
杉族兄太冲舉於應天冲宿負盛名屢躋始達而杉  
以童年與之角勝風流文采照耀江表博習典故遂  
至齊盟三上春官不得意而歸一夕卒兄冲哭之哀  
口松侶神清體弱遽爾徂謝斯人不壽乃文運之厄  
非止家門不幸也家貧恥于謁事繼母至孝  
雖被訶責無幾微忤意所著有松侶自怡集

湯之奇

字癡常少穎悟四歲就外傳讀書目數行下比  
字句先生長者矜異之萬曆戊午舉於鄉後官太平  
府兼署江防事時流寇蹂躪梁豫間之奇設方畧擒  
其渠魁餘悉解散督上下糧餉所過立辦兵食以  
濟尋陞江西瑞州知府未至官丁母憂居家閣門謝

客會浙撫疏薦以疾堅辭遂罷築室東園名曰蓬菴  
讀書灌明課子姓其中所著有蓬菴類二十卷孫右  
曾文譽冠當代戊辰成  
進士今任吏部侍郎

**鄭之惠** 字孔肩一名圭父炳太倉倅嘗舉一子曰之瀚  
殤呼天而號夢登高丘有帝者堯玉几授以圭

拜而出見殿壁榜書勅十人抹之瀚名易以之惠炳  
不解後生男遂名之惠既而又曰神授我圭遂更名

圭少補博士弟子員穿穴典故精研經史遂為士林  
所推十一入棘闈以貢士為校官擢平樂令適平樂

有汰軍事軍譁不解之惠單車叩壁壘宣朝廷意事  
遂定僅以常格轉州守未幾謝州守命告歸子鉉有

異才為諸生甲申聞都城  
變慟哭出門不知所終

**張元徵** 字夢珠元徵生時母夢龍含一珠授之遂字夢  
珠生而穎異更折節讀書早歲喪母從父遠學

晝夜參悟豁然有得遂與鄭之惠齊名北面受業者  
益眾武林屈指經明行修之儒無不以二家為標的

錢塘縣誌

卷之三十三

人物文苑

十一

久困諸生一試京兆為遂安方閣學逢年所知已而  
得乙及折副卷嘆曰嗟乎吾生平服膺元徵手其文  
不置而竟坐冬烘耶年且六十以明經令平遠平遠  
在萬山中民未知禮元徵時時從博士弟子說詩書  
講社學懸筆楚於堂示  
不忍用民益愛戴之

**翁開之** 字叔朗貌軒軒若霞舉天啟甲子舉於鄉  
閉戶讀書不與外事著述甚富惜失傳

**丁允和** 字叔介天啟丁卯舉浙江鄉試性和而介安貧  
自樂雖衣敝履穿恬如也以文章顯於時與翁

開之齊名時有孝  
廉二君子之目

**沈繼震** 字子起少質直父置書膝上教督之繼震跪而  
受教及長周規折矩不踰尺寸為諸生四十年

非試於有司不公謁亦未嘗一贖至郡縣門弟子束  
脩外不妄收一錢病妻弱女四壁蕭然支一足鐫以

繼且夕力學嗜書尤長於春秋窮老無子寢疾  
猶吟咏不輟晚更名階張高士遂辰為作傳

**施莊**字康夫居紫陽山少貧力學性穎異為諸生試輒高等願喜自負人目之曰狂生左方伯吳某極重之延上座莊衣大布衣著高齒屐踞客座高談今古燭跋不使去因謂人曰施生貧我周恤其家弗使知也烏傷傳巖奇其才以妹妻焉巖成進士而莊屢踏省門不見收設館鳳山之陽戶外屢恒滿武林號為

施氏學

**何萃**字翰亦少孤力學與施莊友崇禎間兩中副車已卯以貢入南雍吳太冲時為司成移書吏部曰萃

武庫甲兵今朝廷急士當及鋒用之會為忌者所阻免歸亦設館鳳山之麓武林從游者曰何氏學所著有古今治平畧補廿一史彙纂類法篇諸書

**潘之淇**字爾瞻為諸生屢上有司輒報罷乃捐去俗學斐然有志於述作嘗曰能讀不

能悟說鈴空濫觴能知不能行跛躄如瘡瘍於孝經小學易春秋尚書詩禮各有著為詩古文皆有法度

人物文苑

錢塘縣誌

卷之二十二

十三

之淙字無聲與兄之淇自相師友家貧移書就寺燈讀之終夕不寐以詩文名當世學者稱為二潘先生淙子士韶亦有文名

**吳之龍**字雪門歙人生有異資讀書一目十行下治春塘從學使葛寅亮講學湖南業日進時有英流之目

屢蹶不售遂絕意進取謁選得光祿丞與米友石劉半舫諸名卿日唱和詩迅發老健性豪邁不樂繩束還隱西湖結竹閣社四方詞人無不歸之瘦筇過頂白髮飄然人謂地行仙云

子山濤崇禎己卯舉人

**馮廷槐**少參自南兄子博洽羣籍下筆英邁自成一家晚年自稱二酉山人不復求進取著武林近事

卷十

**傅齡文**字長質禮部主事巖長子巖狗金華之難命齡文前行得不死俄而有傳其父及兩弟俱死者

齡文欲反走視之人勸曰如以肉投餒虎耳何益齡  
文泣曰天下有無父之人乎得待先人九原文之志  
也已而兵亦去歛父弟骨權塋於山中遂棄諸生奉  
其母歸杭藜藿不克蓬頭垢面者且十年而卒齡文  
少爲諸生善詩古文喪亂後作詩多以敗筆書壁間客舍人爭相傳誦

### 虞宗瑤

字仲稿吏部淳熙次子幼慧好學與兄宗玫閉  
戶下帷自相師友玫字大赤豐軀偉貌生時  
面如紅玉故名爲人樸訥罕事文飾而瑤則英敏爽  
朗每發議輒解人頤與友交初甚落落久乃益篤一  
友馮棕病將死謂其家曰吾貧不能殯將往死於虞  
氏瑤聞之即共往迎棕輿疾入其室三日卒遂買  
地以塋瑤先玫二年卒卒之日玫束其  
遺稿藏之明年火樓殿平生撰述俱盡

凶朝

### 章士斐

字其上諸生一桂子九歲喪母又一年而喪父  
育於繼母高氏章氏故饒資一桂歿後爲弟一

## 錢塘縣誌

### 卷之三十二

人物文苑

七

槐蕩廢都盡意寡嫂之旦晚去帷而此貌諸者必不  
克成就也是時士斐纔十有三歲耳奉祖母徐繼母  
高就市樓一椽以居爨突不黔或三旬九食而性喜  
讀書家貧不嘗得油會承重祖母喪輒就棺下燈燭  
而讀之嚴寒無被覆以衰麻卷縮戰慄聲與歌誦聲  
間出隣人聞而憐哀餉以餅餌士斐進以奉母母不  
食佯曰已食矣還以飼孤士斐察母有饑色因大慟  
日徒以不孝孤在累母至此欲往沈於河母高覺追  
及之母子相持而泣高曰兒能自振拔報我有日兒  
志何短淺也且哭且行牽衣而返士斐益復奮勵鑽  
研六經以及子史百家靡勿淹貫而深自韜晦不肯  
苟出與試或強之曰吾學未成也中表農部某以茗  
郡守故世通家命其子赴試於茗乞士斐與俱堅辭  
不行母高泣責之士斐跪謝曰兒聞士君子始進必  
以正今往試亦未必售即售得爲榮耶年十九受知  
於錢塘令魏士章七覆核而拔冠軍郡守學使者皆  
試第一補博士弟子員旋食餼二十人中聲名鵲起  
錢塘顧咸建嘗會課諸生手兩卷不能定甲乙適臨

川陳際泰來杭顧出以示之陳曰某卷清廟明堂之  
音取科第如俯拾地芥某卷奇峭折殆昌黎所謂  
鑿空構立者吾斷知爲古文作家然鴻飛冥冥非網  
羅中物也顧笑曰吾固取其必傳者遂拔士斐爲首  
而以姚元煥次之姚後成進士而士斐竟以明經老  
焉爲詩淡泊明淨得陶徵士風味年十歲時讀昌黎  
滕王閣記便悟作文無成法故嘗自關蹊徑不屑襲  
前人一字一語始猶伯仲退之晚則駸駸乎司馬子  
長矣所著有花隱亭詩文集及天台固始兩縣志評  
述有國語國策莊子水經注讀漢書記文選八代詩  
乘韓昌黎集李長吉集纂輯有玉海名山記月令廣  
義職林故事荆川稗編訂補行世者有治平畧士斐  
卒年六十有一易簣之頃時母高尙在目不瞑淚泫  
泫下且注視久之忽疾呼阿母阿母而歿子三長戡  
功邑庠生能文早世別有傳次撫功歲貢  
生次藻功康熙癸未進士翰林院庶吉士

陳戩

字天祓早有文名下筆灑灑數千言不休登順治  
乙未科進士歷禮部正郎出守長沙未任以親老

錢塘縣誌

卷之二十三

人物文苑

古

乞終養凡七上臺憲不允竟以病告家居凡四十餘  
年足跡不入公府蕭然敝廬讀書自適巡撫趙公士  
麟每就其家咨訪戩於學道之外不及當世事天性  
孝弟父常患沉疾戩採藥天台山中遇異人授以方  
疾遂瘳世遺田畝盡奉予諸弟而不責以稅曰吾叨  
一命而不能庇弟昆其忍以催科累之乎妹適人早  
卒遺一女撫之無異已出士大夫以德行聞於鄉者  
首推戩焉丁酉典試陝西冰鑑稱得人有門生爲天  
台令以戩家居食貧厚遺之方閩逆煽亂之後戩悉  
捐以贖難民其清介又如此年八十考終於家戩一  
生清介不事浮華深體躬行實踐之學雖一言一動  
不失先民矩矱耆德如戩足以挽頽風而振末俗矣

陳祚明 字希倩僉都御史潛夫之弟年十二就試學使  
奈何倩人當面試面試拔置第一時有江夏黃童之  
日未弱冠隱居不出行文如長江大河一瀉千言筆  
不加點詩律工細在岑王沈宋間京師巨公聞其名  
爭禮聘之山陰胡兆龍宛平王崇簡引爲布衣昆弟

交命子若姪俱北面受業焉凡條奏中外利弊時政得失祚明爲屬草明懲剴切輒報可以故朝貴促迫暨丐筆墨者戶外屢常滿劉穆之曰覽手答耳行聽受口並酬應世多不信有其人得祚明其左證已歲入脩脯可數千金而性豪爽一切客遊長安者知與不知生館死殯胥於祚明是賴家故貧營葬兄嫂及撫遺孤姪及孤姪子女各各婚娶食指凡五百餘勢不能息肩歸里卒客死京師所著有采菽堂詩集二斗卷詞一卷又采菽堂古詩選評選戰國策行世未刻有采菽堂文集三十卷床頭集十六卷子曾毅能讀父書年十五作靈鷲賦頗似三都兩京格調著有斲冰詩集十二卷

**吳農祥**

字慶百宮詹太冲長子生三歲夢醒輒啼啼竟輒喃喃自語至五六歲方止乳媪諦聽之所言

似類永樂初靖難事者少時異敏一覽成誦家有賜書父友鄭觀察廢唐錢太守喜起朱明府稷錢明府朝彥咸折行輩與交好古之士自遠方至者婁東雲間金沙候官皆造請邀致堅謝不通旣稟父遺訓亦

錢塘縣誌

卷之二十二

人物文苑

五

自以出與王許子弟爲群在裘馬裘屐間非其好也鍵戶讀書欲以著述成名茹經涵史馳騁百家然不妄作常語人曰爲文當有關輕重非偶然者故雖伶人賈豎應其請乞皆有挽世末流咨嗟愛惜之意或有病其多者唯司空陳鼓永識之曰此盛世景卿麟鳳也經國宏業固賈生晁令之儔卽雕蟲小技亦相如子雲之亞其爲公卿所推重如此康熙戊午

詔大臣諮訪博學宏詞之士鼓永遂以祥首薦而巡撫陳秉直又以名聞咨送入京

召試

太和殿俄爲忌者所中報罷歸而網羅當代之遺聞

蒐輯勝國之軼事著書自娛詩不下萬餘首多比事託詞之旨激昂發越蓋自漢魏以迄三唐詩人以來未有若祥文辭之富者總督尙書李之芳旣定閩亂聞祥名請一見祥亦以子有大功於浙願往謁之至則長揖就坐翌日宴之別堂命軍中射以侑觴而屬祥卽席草露布祥口占一紙吏執筆立書數紙詞義整已復從容陳善後數事李大驚曰今日乃見君濟才欲留之幕中祥辭謝歸某山林麋鹿非慕

材且平生嘗笑徐涓今乃身自蹈之耶李知不能留  
乃聽之歸祥為人剛介亮且其爲文條貫五經而尤  
精於易與蕭山毛奇齡友善嘗論五經同異及宋儒  
性理之學質疑送難反覆精析然不肯苟同所著書  
有補錄文獻通考八十卷綠窻讀史五十卷明史瑣  
事一百卷唐詩辯疑六十卷詞苑六十卷輿圖隸史  
彙考八十卷錢邑志林四十卷梧園雜誌二  
十卷蕭臺集二百四十卷卒年七十有七

### 徐林鴻

字大文天才俊逸早有聲藝苑開時要東雲間  
江左與武林諸名士各立壇坫以文章震耀一

時鴻以年少馳騁其間爭引以爲重試有司輒冠一  
軍尤工詞翰上擬左氏下類兩晉人各藏弄以爲榮  
一日在客座臨當遣使寸楮百函付鴻屬草信手給  
發頃刻而就會修浙省通志傳人物日可了十許傳  
咸謂有良史才戊午

詔舉博學宏詞之士巡撫陳秉直以名聞召試  
闕下試後病歸遂無意仕進奉其叔元彪掃一室臨流松  
竹讀書其中作爲歌詩清新典麗多哀怨之音嘗游

## 錢塘縣志

### 卷之二十二

人物文苑

共

滇上書當事勸立瞿式耜張同敞祠爲作迎神送神  
曲絃歌之士人爲擊銅鼓鳴鐵笛苗僮蠻女皆  
泣下漢陽王世顯南昌王猷定客死於杭鴻爲視含  
歛送其旅櫬歸太倉王吳四明周容卒京師皆爲治  
喪又收其遺稿歸付其家人所  
著有兩間草堂詩文集四十卷

### 張遂辰

字卿子其先江西人父徙錢塘因家焉少時穎  
異不屑爲舉子業喜讀史漢百家言遂工古文

一遊成均由吳江渡秦淮涉金焦過牛渚董文敏公  
其昌陳徵君繼儒見之曰天下奇才也因交李流芳  
錢謙益輩聲名藉盛幼善病日檢醫方因遂以醫名  
辰博綜典故考究古今無不精核年老益謙謹日讀  
書不倦詩格在右丞襄

間年近八十始卒

### 徐元倬

字爲章負雋才童時詣舅氏張青林所時高會  
大幔亭上張指亭爲題曰汝方業文選能對客  
賦之否倬援筆數千言舉座嗟賞張摘其中賓餞曰  
片吐納烟霞二語榜其櫪十六饋郡庠爲人嚴氣



性不妄與時流接與其弟元彪鍵戶讀書以尊遺經  
及終學爲己任未嘗懷半刺謁人嘗嘆經義蕪穢後  
進小生類皆剽耳傭目茫無根柢故其爲文必深入  
理窟而以清真出之力追正始會申西多難遂栖遯  
以老杜門伏枕足踪不屢闕外所著有壑存集三十  
卷湛華樓詩集三十卷小杲篇十卷山圖別集四十  
卷

吳山濤

字岱觀晚號塞翁領崇禎己卯科鄉薦三任廣  
文授陝西鞏昌府成縣令彈丸小邑當兵燹殘  
破之後錢糧協濟極爲民累抵任力請題改邑人至  
今猶建祠祀之二年卽致仕終老吳山越水間嘯歌  
自得書法飄逸能自成家畫不入蹊徑殘山剩水揮  
毫自如然往往爲世所重出關日賦西塞詩三十篇  
詞人學士多能誦之

陸培

字梯震父運昌吉水知縣與其弟鳴時鳴燧俱有  
名當世號龍門三陸而培兄圻弟培並以文章領

年八十七無疾終

錢塘縣誌

卷之二十二

人物文苑

七

袖東南一時繼起復號三陸

皇朝定鼎培以行人殉節圻與培奉母隱河渚圻以醫往  
來茗水間而培授生徒選試藝及鄉舉程墨爲龍門  
集繼先志亦以資菽水歡也會圻構奇獄全家被逮  
培夜行晝伏剋期至京匿所親所出牒求救已而得  
釋圻出棄家爲緇流不知所終而培仍教授於家巡  
撫張鵬翮高其行聘爲師集浙省能文之士皆北面  
爲弟子每試培爲定其甲乙成名甚衆刻有四書大  
成行於世

羅萬象

字森伯父源江萬曆歲貢授江南歙縣教諭世  
居江游學者稱爲源江先生萬象早有聲壇坫

爲人篤厚純粹其教門弟子以孝弟爲本文學次之  
一時江下名輩若何莘項大章何湘來並轡聯鑣爭  
衡藝苑已而四家子孫俱以科第顯而萬象卒老於  
諸生僅一子元儒誠慤有父風以父老服賈孝養而  
終無後云

沈九如

字宣子性至孝事繼母尤謹父鴻居好客遊歷趙閩粵音耗斷絕九如襆被往來不期歲奉之以歸為文有根柢晝夜矻矻垂老不休即其餘為制義屏掃庸靡癖澁之習垂老以明經為江山訓導時江山值閩亂髑骸滿山當事檄九如往收戰骨乃喟然曰是非仁人之意乎僕雖儒官何忍辭其難於是躬歷萬山自衢之九龍抵仙霞嶺穿虎狼荆棘中拾殘骸瘞之為大塚十有二處其餘隨地掩埋為文以祭之又奉檄視馬槽修壩梁濟灘河塞決口皆有功轉嘉興教諭督撫聞九如博學徵修浙江通志年幾八十矣館於貢院筆札犀利出腹笥而授之三句而畢病篤呼其子宋曰吾有所語汝具紙筆記之問之已瞑矣

張芬

字子漸家宰瀚四世孫弱不好弄博綜典故有質疑者應之如數家珍時東南人才多負盛名芬與其叔岐然及江浩虞宗致鄭鉉輩創為讀書之社其法約數人共讀一書數日務了一義盈科後進最有

錢塘縣誌

卷之二十三

人物文苑

六

條貫學古有志之士問難不輟而芬亦以砥礪行義狎主齊盟為已任晚耽棲逸愛西溪衡山之勝時握書一卷吟哦其中立石拒門編荆為戶危冠大帶不入城市兵燹後盡亡其書老年默記從空甲乙指點雖貧且病不廢也芬性孝友祖母病衣不解帶者三年事伯兄如事父兄卒質錢以歛撫其子不啻已出雍穆之風尤人所難

吳名溢

字我匏崇禎二年補錢塘諸生時復社方行婁東甫上諸名宿舟車絡繹溢皆與焉鼎革後棄舉子業不復出兩喪皆廬墓著喪禮注晚年構藥園於城東與嚴沆查繼佐柴紹炳關鍵丁文策袁于令祁豸佳吳山濤輩觴咏其中有藥園盍簪集查繼佐序云明季文體詭變尚諸子百家仙釋語錄聳牙信屈之文溢乃沉酣六經蔚以實義作麟經證解考三傳互異折衷諸家為春秋詳注嚴司農沈警語人云杯巒標致當推是公非晚近人物卒年七十有六

李式玉

字東琪少雋異讀書過目成誦年十七補郡學而外九流諸子旁逮外家雜說凡奇文古字罔不搜討故其文詳贍閱肆能盡達其意所欲言尤善詩歌精音律所著有魚川前集二集  
巴餘集春城樂府三都樂府

吳秋

字雁市十歲能詩卽自負不肖下人已乃見章士斐遂驚禮曰是吾師也士斐於古文則尊昌黎於詩則尚孟郊盧仝而秋則創爲生割排突之調跌宕自喜遊京師諸貴人招之不往遊西江李侍講來秦集名士與飲酒酣大聲曰吾浙中名士僅四人問其故則曰吾師章淇上次則吾宗慶百志伊問其四不答時多浙人在座深惡之康熙甲寅由閩入粵值兵亂所善友爲亂兵所縛徒步千里往救之轉客沅湘間歸而發病且卒嘆曰吾死無繼吾爲古文詩者天也

吳若茂

字念溪家貧力學砥行尤工於詩性好山水每出游歸卽成帙從游者日廣晚乃參究伊洛之

錢塘縣誌

卷之二十三

人物文苑

九

學盛暑嚴寒不輟注西銘太極諸書爲士林所傳誦卒年八十有二所著有環山樓文集

一 郎星

字友月與虞汝翼友善兩人俱雄才博學嘗與人論古今廢興縱橫貫穿斐然可聽品格高峻務以氣壓時流得一奇快士必徧告同學借以齒頰不靳也星試有司冠軍者四十有九卒不遇所著有楞嚴四書合疏  
萬安縣志

毛先舒

後改名駉字穉黃生而早慧篤志嗜學六歲能辯四聲工詩善屬文爲陳司李子龍所稱賞時文社方興舒與張綱孫沈謙陸圻柴紹炳孫洽吳百朋陳廷會丁澎虞黃昊相倡和稱西陵十子山陰劉都憲宗周講學於葢山舒執贄問性命之學坐語移自及退宗周謂人曰毛生久以篤學擅名豈非東南之寶乎無何竟棄舉子業肆力於古辯析反覆必本經術有鄭玄王肅之概詩以大雅爲主文自兩漢暨唐宋俱兼其體與修浙江通志所登必擇忠孝節義事人感嘆服願好談聲韻著韻學指歸謂字有聲有

音有韻而韻為尤要顧韻有六條一曰穿鼻二曰展輔三日斂脣 抵齶五日直疾六曰閉口又撰唐韻四聲表及詞韻南田韻諸書思古堂等集行世

**虞汝翼** 字異羽生而穎異為人談忠孝事撫掌驚四座意所不可輒面斥之翼家世以儒顯弱冠卽擅作者名古文雄辯馳騁為詩古雅弘健以文名雄兩浙者幾四十年卒不見售憂憤成疾卒

**沈謨顯** 字靖宸少穎悟博涉經史百家年十九補諸生試輒冠軍為文理法純粹時徐太宰潮方就外傅贈公欽安以為微某莫可師者因延家受業焉顯業日進理益淵邃而文益高老四方來學者戶外之轍恒滿甲午闈卷僥得復失癸卯以貢入太學丁巳選石門訓導設六條以課士薰其德者悉成令器顯為人師最有法度授以經學具盡淵源門弟子登科第者上則以勳業顯其次亦文雄一時如徐太宰潮顧進士鐔其最著者也顯性孝友一門內順睦為人煦和冲穆尤篤於姻戚有以緩急告者傾囊以應不

### 錢塘縣誌

### 卷之二十三

人物文苑

二十

責債甲寅紫琅山寇竊發難婦轉徙流離者百計營贖之不問有無已未

詔舉天下博學宏儒之士當局者欲薦之堅辭不赴越癸亥而卒所著有澹園詩文等集

### 陳晉明

字康侯侍御潛夫季弟潛夫既以節死晉明偕兄麗明祚明奉母隱河渚不出幼時偶以嬉戲

失母歡將撻之晉明隨自伏地受責曰母無傷手後博極群書尤耽於詩學造沈宋王岑之室而要歸於杜陵間或授徒效為制藝受其業者皆授高第去所著有詩留拾纓采菽堂等集所選有入代詩鈔初盛唐詩嘗謂王李但揭高華鍾譚專搜冷雋兩者失均故其選唐也融二家之旨而集以大成稱善本云

### 王脩玉

字倩修父名世明歲貢為鄱陽令修玉性至孝弱不好弄而嗜讀書方成童祖母陳老且疾

夜露薊祝天願減齡益祖母壽忽夢黃衣人示朱書九十三字後竟符其數父以誣獄被逮吏卒環之嚴脩玉往視鞭笞交下不為動父在縲緲凡飲食浸弱俱脩玉手報其勞後卒得釋弱冠以第一餼於郡庠

家貧養殮不給不廢吟咏以故學益淵邃制府趙廷臣以厚幣聘教其子脩玉不忍違諸生去固辭中丞范承謨嘗語學使曰君知王某乎不獨其文可重人尤可師也歷試鄉闈十有七詭得復失者三戊午貢京兆時徐太宰潮以詞林分校得脩玉卷嘆曰此名儒宿學也板第六部授邑博士當是時

天子方下詔舉博學宏儒科嚴司農沆王都諫某擬以名上脩玉堅辭歸家益貧日常一食暑月著故綿衣恬如也因號恬翁性方嚴不可惑以非義於人落落難合既定交久而不衰與毛先舒吳任臣虞黃吳徐旭齡輩訂詩文交世稱鷺山十六子楚術士朱方旦至武林官吏以下皆執弟子禮每出男女擁簇門人或欲往謁脩玉止之曰術家妄言禍福與之遊多小測憂况方旦復侈談理學諛者謂過程朱更相銜譏敗亡日矣未幾朱果被劾棄市株連者甚夥衆始服其先見平生著作甚富而尤工於詩少與西陵十子相倡和中年好遊覽因探禹穴登岱峯入關里拜孔子廟堂至天台訪石梁之勝凡遇於境而觸於心者悉

### 錢塘縣誌

### 卷之三十三

人物文苑

三

發之於詩以故神明變化純任自然晚而益進著有汴遊松壑蕭遠堂據梧叢說等集各如干卷卒年七十有四葬黃鶴山下學者私謚曰文節先生

### 徐繼恩

字世臣性至孝父病刲股以進而愈繼恩生而早慧博極群書補博士弟子與陸圻培柴紹炳

吳百朋孫治友善以文名雄於時中崇禎壬午副車鼎革後絕意仕進遊於方外所著文辭甚富有周易畧解漆園指通師古堂集諸書行世

### 孫浣思

字嘉客少爲諸生名籍甚屢試輒高等明季東南盟社蠶起爭得浣思爲壇坫主而浣思又愛賓客四方來謁者屢常滿戶外勅中厨辨肴核劇談賦詩累日夜不厭懼祝融者再家益貧晚年閉戶著書爲樂卒之夕口占絕句四首端坐而逝

### 沈佳

字昭嗣見時卽有志伊洛之學及長著名儒言行錄大全粹語春秋學徵脩浙江通志及一統志晚

年著易大象說易解明代人物考樂府中聲蒼野集  
省愆錄皆研窮性命之書所居名學士園自少仕以  
至通籍及歸養未嘗輟書卷武林士大夫推佳為學  
者登戊辰進士授監利縣令抵任八月以終養歸復  
補安化縣卒於官親喪三年麻衣粗食  
哀毀骨立佳篤於根本故能盡孝道云

**孫治**

字宇台少穎異通左國春秋喜秦漢文故其為文  
沉鬱入古與弟洽為諸生祭酒隱居教授講學湖  
濱友人陸彥龍臨歿托以女治擇吳任臣妻之吳百  
朋宰南和客死治往經紀其喪性廓落不羈然好獎  
拔士類卒年  
六十有五

**章戡功**

字服伯母沈孕二十四月而生生而髮覆眉目  
三日父士斐試其啼聲曰此再來人也幼凝重  
不苟言笑九歲通五經捉筆能文章屢躋童子試年  
三十八始受知督學劉霽案發而戡功歿已四日矣  
歿之夕隣人露坐見火光迸屋梁出升墜者三群方  
喊章氏火既而聞舉家哭聲咸詫異之戡功善詩古

**錢塘縣誌**

**卷之二十一**

**人物文苑**

**三**

文纂輯新舊唐書六十二卷尤精點染師董巨惜少  
存者妻羅氏苦節四十年以弟藻功子繼泳為後曲  
盡色  
養焉

**顧龍文**

字仲御生而溫恪不妄言動為文宗先正屢試  
與弟豹文互冠軍世咸謂顧氏二難順治初文  
章之士通南浙稱盟會水火異同所在馳騫龍文杜  
門不與獨與陳國器朱建寅錢世瀚鄧維垣馮止驥  
輩為性命交性尤孝友約已  
和而介為同類所推重云

**葉大緯**

字緯如長身高步每盱衡時事授經墟史聽者  
開發篤於友義順治初謝諸生任駱村不入城  
市甲午侍御姜圖南言於督學此天下才不可失檄  
使復諸生已酉舉於鄉未幾病卒所著有嶽表堂

**朱大點**

字幼鴻弱冠以才名聞於時與江起鰲友善為  
諸生都講擁皋比升上座長筵廣席環而侍聽  
者日凡百十人所著  
有易解三十二卷

江起鰲

負氣抗直不少假是非而獨善處人骨肉間與朱大黠咸精於易時武林言易名家必稱朱江

從游者日廣所著一有講易數言十卷

鍾越

字異度少負軼才游太學於書無所不綜好購書畫至礙行路著史評與古人相出入所交盡名士

而與許璣鄧名揚俞龍友為尤善

許璣

字天儀為諸生以文明於時崇禎丙子中副車與朱東觀陸彥龍章士斐相友善有唐書纂二十卷

鄧名揚

字左名性至孝年十五與其父同游於庠讀書目數行下手自寫書至數尺周禮考工自有汪

俞龍友

字雲君幼孤嗜學為諸生試輒高等與鄧名揚少相結縱飲連日夜未嘗內食坐上一日無勝

友輒不怡為詩新穎出人意表子星留少孤能屬文

湖為七郡水利一書未竟而卒

錢塘縣志

卷之二十三 人物文苑

蔣庸

字不易通諸經尤粹於易著易解一編行世

張競光

字又競推官懋忠子年五十學為詩有建安黃初風格將死以屬其友吳農祥集而傳之

吳農復

字敦仲太冲次子少年操筆即能為文作蚊檄及范增辨縱橫自喜太冲司成南京攜以往為

黃相國道周所賞六赴棘園得而復失復性孝友嘗封股救母

洪吉符

字原明崇禎舉人績學工文精楷法與兄吉臣吉暉齊名時有城西有二洪英英文字雄之語云

施瑞麟

字儀吉為少時每試輒高等大學士黃文僖機聞其名館之東閣康熙丙午

詔求實學以策論取士瑞麟謂機曰士必明孔孟程朱之理而後可以議論經術奈何舍本而求末乎機遂疏

請復制舉義門下士多取科第去而瑞麟願以明經

老為兒時到股以療父疾其後子裕真幼見其創而

問曰此何為者麟語之故裕貞曰行孝當如是麟曰脩德礪行顯親揚名乃謂之孝今不得已傷其體膚

未足為孝也瑞麟著書甚富而屢毀於火其僅存者存古堂詩集十二卷

汪之涵

字偉生原籍新安今徙錢塘開朗通達遇事能斷國初當事以人材薦當除邑令謝不往乃

署餘杭訓導捐葺學宮請廣泮額嚴侍郎沈稱其端規礪俗有胡安定之風邑紳士為勒石明倫堂以頌之未幾謝去歸家後著書自娛蕭然物外年八十餘卒

沈蘭或

字方稷幼聰穎絕人年十一應童子試作大樹賦見賞於司李雲間陳子龍十七歲補博士弟

子嘗作太祖平元賦當世艷稱之年十九

國朝鼎建

卽與兄蘭先及同志諸人講學河渚不與試

事室常屢空晏如也中年深究易理作易義炳闡明先聖之微義其後授經弟子執經受業者甚眾為學以躬行實踐為本不屑屑為章句天性孝友事父母以色養稱敬愛兄弟處族黨姻戚間一以誠意孚人晚年益從事心性之學子位中性篤孝言論不苟受業於應為謙之門其學一以誠敬為歸歲時祭祀必

錢塘縣誌

卷之二十三 人物文苑

三四

齋戒易素服朔望展墓常徒步數十里講學棲水操行端方友愛諸昆弟尤為篤至弟用中歿位中自棲

水歸拊尸一慟得喀血之証而卒

殯之日諸親朋聞之無不隕涕

施清

字伯仁少穎悟篤學嗜書為伯邦曜所知及長工詩文補博士弟子員以選貢授國子監官學教習

課士嚴而有法陝西布政司經歷尋知巴州會應詔舉博學弘詞試

闕下

歸數年起廣州判以內艱歸補永州王岳麓書院講

席學者雲集所著有十三經異同解攬雲懷新等書

陸埏

字左城吉水令暹昌第六子少有文名藻思綺合所至皆有逢迎幕府羅而致之軍書旁午數下言

立就所著有

丹鳳樓諸集

洪昇

字昉思少負文名車轍至止公卿大人咸虛席以待尤工樂府宮商五音不差唇吻旗亭畫壁聞時

聞雙鬟謳誦之以故兒童婦女莫不知有洪先生者顧性落拓脯修所入不啻數千金隨手散去尋以老



病歸里而卒

裘之雄

字偉南篤學砥行以文名顯於時甲申後絕意仕進士大夫非造門延訪不一往見與朱東觀

陳廷會及其甥陸圻皆相契好時稱其特立獨行比古之婁師德云所著有天中記時物令序纂歷代史傳紀畧諸書以子陳珮貴贈如其官

錢照

字水鑑幼即能文十七補諸生試輒冠軍時文社來者咸願出門下以為榮受其指畫無不拾青紫以去而照卒以諸生終已酉闈中文為主司所賞得而復失遂罷試尋卒

仲恒

字道久父敬則以文行著於鄉載郡志恒九歲能文長負氣節事母金少不憚即長跪俟顏霽始起伯兄鼎遭謗下獄恒未弱冠變服為傭保策應得脫居常泊如其婦鍾校讐卷帙或累月不出庭戶於

錢塘縣誌

卷之二十三

人物文苑

三五

書無所不讀所著有四書彙纂二十卷大禮簡四十九卷春秋井觀三卷宋詩鈔萃十二卷詞學全書四十卷淇園文集十卷編年詩鈔八卷題虹讀六卷學者稱雪亭先生婦鍾忠惠公化民女孫名筠字蕢若以賢孝聞所著有梨雲榭詩餘三卷琪園詩文集四卷子清有經術能世其家

錢彥雋

字聖植淵靜嗜學幼即潛心經史嘗赴越省祖墓遂應試為山陰諸生弱冠遠遊秦豫與新鄉

呂中丞叔琳楚黃張侍講希良華山王徵君弘講論經學著有冠禮易從古皇帝考古史異諸書晚益肆力實學與毛奇齡沈佳王復禮輩集四方宿儒傲釋奠禮設經會於學士樓有會子問大學講錄行世天性孝友幼喪母哀毀如成人色養耄父委曲先意及卒執喪旦夕不離苦鬼會隣火夜發倉皇度不可救烈焰中猶衰絰杖跪呼號欲殉按察使于準急率役昇柩得全年六十七卒

王丹林

字赤杼康熙乙丑拔貢授中書舍人丹林年十五喪其父祖所分貲產約三千金盡推與其仲

兄章爲之綜理見亦欲成就其弟凡米鹽細務戶外交際事不以累心而丹林乃得專精讀書與沈佳凌紹焯顧兆麟輩訂德音文會風雨不輟片休善屬文試必高等而屢題省闈其在京師刻意爲詩麗而有則終中書舍人病歸卒年五十一子宸儁善書供奉

內廷

吳容

字端公早慧八歲通五經鉤索馬鄭毛杜諸家遇三代器物舉對如目前事父農祥嘗嘆曰吾家讀書得古人法者其屬之此兒乎容少受業沈均陳廷會之門兩賢爲東南碩儒及門甚廣而以容爲首年十七博諸生爲文屏去一切馳騁時態詩婉而多風尤善書喜李北海與修浙江通志及杭郡志卒之日年僅三十有一先是容嘗有詩云處世多孤憤因循病易成洛陽空賦鵬祇恐不長生或怪其非吉至是果兆斯識云所著有秋吟集十卷

吳以鏐

字在梵幼孤與伯兄某竭力養母以孝反聞鼎革後隱居教授不求仕進家藏書數千卷手定

錢塘縣誌

卷之二十二

人物文苑

三六

丹黃凡有裨於世道人心者鈔集成書名殉德錄徵士吳農祥爲之序

周世傑

字沛甄原籍常州隨父宦游遂卜居錢塘少穎敏十四補諸生爲文縱橫排蕩工詩與王脩玉

齊名修玉以學勝而傑以才勝嘗謂詩貴自出性情袁不擬劉高不仿薛何必步趨先民循循規矩也歷試不售貧甚詩益工年七十有七卒無子所著有觀繼草堂等集

張瀛

字禹臣爲人木訥寡言笑而善讀書好談古忠義事受業章士斐之門爲詩初從宋人徧取宋人集

甲乙之將以問世不果後取漢魏六朝詩誦之詩益工嘗就正於毛奇齡奇齡爲訂定題其卷首曰三百篇章撫功爲之序所謂雪巖詩集者也卒時八十有七無子

戴大受

字與可別號華琳早年卽棄舉子業志古學博聞強識自經史諸子天文地理無不覽究更取

五經傳註精研之爲窮理盡性之學而尤邃於性理一書鉤元探奧因喟然曰聖賢之道聖賢之心也聖

賢心卽吾心也。蓋與宋儒之默契道體相印合焉。嘗中夜賦詩有靜契羲圖，明月近壯觀，帝典惠風和之句。又俯仰悠然，文字外風行海宇，日月行天，其造詣如此。居恒語子若孫，吾自少至老，每十年輒成一書，皆手自編錄。其已刻行世者曰：世寶錄、醒心錄、蓄德錄。皆集古嘉言，懿行條分，而品節之多，與人爲善之意。其老年刺草及美拙百咏多發，并其胸次所得云。年九十。

諸匡鼎

字虎男，少而博覽群書，壯喜出遊，間就鉅公幕。擊舟負笈，率攜書籍以行，暇卽纂述。故一生所著有楠苑詩文鈔、楚遊日記、茗柯詞等篇。所稱說詩堂集者是也。子璧，發能世其業。

沈鏞錫

字子方，負軼羣之才，聲振庠序。爲文洋洋灑灑，貫穿秦漢唐宋，而尤精於左史二家言。詩愛玉溪生，曰登老杜之堂，而免於僨拙之弊者，惟義山一人耳。以醫世其業，望沈君來，如望慈父母，來則應手，輒愈。自督撫下，咸敬禮之。嘗延坐，竟日與談經濟事，掀髯長嘯，手采奕奕，動人人，亦莫測其底蘊也。

錢塘縣誌

卷之三十三

人物文苑

陳成永

字元期，性孝友，少雋異。工文章，康熙丁巳領浙。江鄉薦，辛未成進士，甲戌殿試，授翰林院庶吉士。以內觀歸，尋卒，不竟其用論者惜之。所著有攸好德堂集。

孔衍昌

字旦華，主聖齋，少魯力學，攻苦丙夜不休。乙酉補諸生，旋以五經中式，時衍昌年纔二十一耳。儒雅翩翩，哀然首選。同學者咸望塵不及，而衍昌絕不以此自滿。性孝友，篤於友誼，平居多撰著，善書畫。年不竟，才僅二十九而卒。上諭前之。

姚廷益

字資師，幼聰慧，喜讀書，博學強識，外無所好。十餘歲已善屬文，十四補郡文學，有名諸生間。旋以拔貢入成均試，數冠多士。爲文章根本秦漢，反刑以樸削，僞以具特司農。嚴沆侍御，顧豹文、東南壇坫之宗，深器重之。爲序其遜志堂文集行世。康熙癸亥年。

詔修各省通志，浙撫申丞王國安禮聘名流，皆先達紳士。唯廷益與今翰林章藻功以年少預，其中調選至京。

師掄才授中書舍人得疾馳歸遂卒廷益事親孝父  
士章疽發於背危甚諸醫皆不能治廷益徧禱於神  
不應時有善乩者奉乩祖頗神驗廷益復泣禱請以  
身代俄而乩動云賜汝丹一粒及視之果丹一粒調  
以進父服之痛立止遂愈一時傳以爲神然廷益年  
竟不永人皆惜之有烈山遺稿詩五卷四明山人李  
峴源爲之序納言

楊鼎誌其墓云

張錢灃

字佩兵幼穎悟年二十一受知於督學姜櫛拔  
置第一生平耽吟咏家貧嘯歌不輟然困於諸  
生鬱鬱不得志而卒  
所著有平壽堂稿

汪于高

字昭武號睡菴孝子之夢子夢病南屏山中高  
年十一求省其父迷所向遇親故欲挈之歸不  
可因與偕往父卒事長兄折節循謹不求仕進儒隱  
於家善讀史過目不忘晚尤粹精於易消消息存亡  
之理可以會天地於一身作爲歌詩閒遠凄切尤善  
擘窠書所制筆長八尺曾書觀自在菩薩五字於天

### 錢塘縣誌

### 卷之二十二

人物文苑

三

竺山門卒年六十有三妻吳氏性至孝事姑有道  
相夫子凡親戚流離失所者脫簪珥以周給之

茹之宏

字棕毅性孝友喜讀書工古文辭補諸生試輒  
高等名籍甚晚棄舉子業出遊湖湘間深二酉  
之勝後歸隱邑之安溪坐臥一小樓雖鄉曲  
罕識其面年八十三卒子鏞錡俱有文名

陳廷璋

字克涵幼慧才思敏捷性篤孝事父色養備至  
康熙辛卯以五經舉浙江鄉試第一再上春官  
不第尋卒兄廷度

汪案

字我浚至孝譽平篤學嗜書手披經史暑寒不輟尤以  
不敢干而鄉黨生養死塋莫不當禮持身正毅人  
山邑士鮮物復極和易後以明經司鐸樂清清爲  
且於士之乏者指其俸資以助膏火  
旣歸猶築園誦讀其中聞者稱之

顧澄

美修鬢丰采奕奕所至輒傾其  
笑聞慮無不立爲排解王詩

文詞旁及岐黃卜筮豕言廣交遊主壇站著有

李瑛字月丹醇謹朴茂讀書外無所嗜授徒四十年門

至尺餘許詩宗初盛有集四卷

汪岳

字岳如汪之琦子也穎悟過人十歲能文章十五補博士弟子為人機警長於詼諧聞者莫不傾倒人有過必面叱然無成心世以此多賢之老乃厭棄

凌克蕃

字宗翰凌故鉅族克蕃又名父子折節讀書下筆輒數千言工詩詞駢體酷似温李以諸生終

老惜哉

袁大任

本名祥字楚良因不利童子試更今名遊庠輒高等志意銳金馬石渠間謂可立致偃蹇逢時

錢塘縣誌

卷之二十二

人物文苑

二九

數奇不偶門下士掇巍科者踵接性温和與人少所齟齬交皆水乳合年未六十卒弟杞為之營葬纂輯其詩文以珍諸笥

潘杓燦

字象承號月山磊落英多為諸生不屑屑供咕嗶講經世學自制府下爭相延致所到輒有懋績著未信編及筮仕諸書行世一時為之昏貴父楫精岐黃杓燦習其術不輕試其亦未信之意歟視世之以人命為兒戲者其度量何如也

沈雲鑣

字軼凡温温循道寡笑言文有靜穆氣間為詩歌真摯流溢得陶孟筆意家貧不能具甘旨奉堂上歡親歿終身茹素不內不肉世以此賢之

周晉

字錫蕃邑庠生沉靜淵默一介不輕取與工文詞書法酷嗜鍾王年三十二齎志歿時論惜焉

王元斌

字滄升修玉子也多才力學聲噪鬢序每試輒冠一軍已己

翠華南巡江浙元斌獻太平一統賦

顧問稱獎名動公卿問歷試浙闈三以五經應舉經義湛深原本注疏絕非時流襲取者比屢為主司所賞限額卒不與爲人倜儻豪邁而制行不苟母得危疾與弟元穉到股合煎湯進病立愈與人交然諾不欺粵東學使臧大受聘閱文中途與人兼金密餽求爲邑子入泮元斌怒叱去而嘿不發其事及門如沈近思輩得其指授皆以名顯借徐太史杞遊桂林病卒大史爲歸其喪著有寶言堂集滄洲遊稿

論曰昔聖人刪定六經以授門弟子而游夏始以文學著及聖人歿而微言絕七十子終而大義垂陵裔於戰國燬滅於暴秦至漢文始求遺書伏生申公轅固韓嬰毛萇之徒稍稍間出默識口授補綴殘闕而

錢塘縣誌

卷之二十二

人物文苑

三

賈誼董仲舒蔚爲儒宗其餘諸生多講論同異史記之傳儒林儒林卽文學也以其博學洽聞通達經術有功於聖道也自范曄後漢書儒林之外復有文苑於是始分之爲二夫東漢之末漸趨排偶協之以宮商飾之以華艷至六朝而極於靡麗斯文之弊也甚矣然則果可謂之文學歟賴昌黎挽之於前歐陽正之於後至周程張朱出而理學之風遂盛於宋於是文苑儒林又析之爲三其不可謂之文學歟夫去聖愈遠則其末愈分其弊旣滋則其返必遠易曰同歸

而殊塗一致而百慮儒林文苑理學非有殊也而兼之爲難專而精之爲尤難故嘗求其人於科目試之以制義非理學歟試之以明經非儒林歟試之表判觀其弘博試之策論以覘其經濟非文苑歟乃科目之內百不得一二焉而所謂儒林文苑理學之士又不必皆科目中人其故何也吾錢塘無理學自宋迄於

本朝僅得三人焉曰張九成郎擘應撫謙儒林十八人曰范平全緩輩乃文苑則稍廣矣考之前史亦然然則

錢塘縣志

卷之二十三

人物文苑

三

工文章者代不乏人也其所撰述果足升游夏之堂而不背於聖人之道吾不得而盡知之也大雅君子其爲我鑒別之